



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.228





Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.228



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.228



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.228

1. 6. 228

XXVII IX

Lam. SCHALLESII

Panegyricus &c.

Chr. a. DRAXDORF

111



PANEGYRICUS

Memoriæ

VIRI GENEROSISSIMI

IO. CHRISTOPHORI
A DRAXDORFF,

*Inclytæ Argentoratensis Reip. Prætoris, &
Academiæ Cancellarii,*

publico nomine dictus

à

SAMUELE SCHALLESIO,


Eloquentiæ Professore Publico.



ARGENTORATI,

Sumptibus SIMONIS PAULLI, Bibliop.

M. DC. LXIII.



*Illustrissimi Comites: Illustres inclyta huius
Reip. Proceres ac Scholarchæ: Nobi-
lissime atq; Amplissime Consiliarie ac
Syndice: Magnifice Rector: Spectabi-
les Decani: Excellentissimi Professo-
res reliqui: Consultissimi atq; Experi-
entissimi Doctores urbici: Venerandi
Ecclesiarum Antistites ac Ministri:
Clarissimi Moderatores Gymnasii:
Generis nobilitate, virtute, atq; eru-
ditione florentissimi Studiosi.*

Quantam, si adhuc viueret, gene-
re, virtute, meritis, in Rempu-
blicam, in Academiam, in hu-
manum genus vniuersum illustris quon-
dam, IO. CHRISTOPHORUS à DRAX-
DORFF, vultus præsentis, vel manifestis
generosi tum sanguinis tum animi indi-
ciis, vel blandis humanitatis grauissimæ
fulguribus, lætitiâ pariter & facundiam
dicenti adspirare potuisset: tantum, heu!
luctum nunc, ex luctu dicendi infirmita-
tem,

tem, ex infirmitate dicendi sollicitudi-
nem ac metum, optimi maximiq; viri lau-
des celebraturo mihi affert, quod debitæ
pietatis hoc officium, non aliter quam
absenti; imò, quod multo est flebilius,
non aliter quam defuncto præstare atque
exhibere possum. Quis enim non novos
flagrantis desiderii impetus conciperet, si,
cuius possessione maxime olim felix fuit,
boni iam amissi recordatur? Cuius magni-
tudo, quantumvis etiam antea semper
æstimata fuerit; non tamen melius, ipsa
absentia pretium illi suum conciliante,
quam carendo intelligitur. Enimvero
non ipse solum omnibus tam cari, tam
venerandi mentione nominis iam in do-
lorem revocor: sed etiam, si per frequen-
tissimum hoc Auditorium oculos cir-
cumfero, idem Vobis etiam, Auditores
splendidissimi, euenire deprehendo. Pro-
dunt hoc frontes vestræ, male ad virilis
constantia speciem compositæ: produnt
oculi, non satis bona fide sicci: produnt è
pro-

profundo pectore ducta suspiria: deniq;
prodit altum à luctu proueniens, atq; ex-
pectatione suspensum silentium. Neq;
enim, etsi temporis annui spatium, atq;
aliquid amplius intercessit, vulnus tam
alte adactum penitus coaluit; vt non,
etiamsi leviter tangatur, facile ac statim
recrudescat. Scilicet vt ignis male extin-
ctus, minimo quoq; irritamento reuiu-
iscit, atq; in nouas erumpit flammæ: ita
luctus, quem omnibus tam acerbus in-
cussit casus, quotiescunq; eius memoria
offertur, nondum satis mora soporatus,
facile novas vires colligit; adeoq; ipsum
se non posse sui omnino obliuisci nouis
subinde documentis experitur. Ac ego
quidem mœrorem meum mœrore alio-
rum, non aliter quam ignem affuso oleo,
vehementius accendi; & contra dicendi
vires, quæ alioquin satis apud me sunt
tenues, tanto magis extinguui, non sine
animi consternatione sentio. Neq; enim
eloquentiæ cum tristitia bene conuenit;

A 3

nec

nec diserto esse vacat, cuius cogitationes ac verba dolor animi turbat ac distringit. Unde in magna sollicitudine, atq; adeo metu etiam versor, quomodo & luctui, quem excutere non valeo, & mandato illorum, quibus refragari nefas est, possim satisfacere. Nam, ne ignoretis, Auditores, neue audaciæ mihi imputetis crimen, quod parentationis onus hoc humeris longe imparibus susceperim, audire, quomodo res acta sit, Vobis, quæso, lubeat. Nimirum DRAXDORFFIUS, vel quod virtutis præmium conscientia metiretur, recteq; factorum fructum præcipuum esse existimaret, fecisse: vel quod externos honores, quippe qui non raro etiam in immerentes conferuntur, ceu fallaces ac dubios meritorum testes parui penderet: moriturus in mandatis reliquerat, ut præcisa omni pompa, quali tantorum alias, quantus ipse fuit, funera virorum honorari solent, efferretur. Unde factum, vt multi, cum corporibus
non

non liceret, saltem animis, & bona, quæ
bene Mortuus fecisset, recordatione, atq;
etiam commemoratione mutua, exequi-
arum ultimiq; officium honoris exolvere
certarent. Et Academia quoq; nostra
quamvis intelligeret, nihil esse æquius,
quam Præsidi illi ac Patrono suo, etiã de-
functo, gratias agere publicas, & posthu-
ma aliqua ingentia eius venerari lauda-
tione merita: attamen verens, ne forte
sic modestiæ atq; vltimæ eiusdem, vel
etiam necessariorum voluntati minus fa-
ceret conuenienter; id, quod facere
prompta semper ac parata fuerat, facere
hactenus distulit, tacitis duntaxat laudi-
bus sanctissimam supremi quondam Ca-
pitis memoriam profecuta. Nunc autem
postquam annus vertens tristissimi casus
omnes fecisset recordari, suam illa pieta-
tis declarandæ cupiditatem huc vsq; pe-
ctore conclusam, quod velut liquore ef-
feruescens vltius coerceri dedignare-
tur, in lucem statuit emittere; & quicquid
fit

fit de cætero, se ab ingrati animi suspicio-
ne apud posteros liberare. Nam cum
semper hætenus nostra illa non minus
morum bonorum, quam studiorum ma-
gistra, alumnos suos per & præcepta &
exempla grauiſſime docuiſſet, homines
de republica aut ſchola quomodocunq;
bene meritos non in vita tantum, ſed eti-
am poſt fata eſſe honorandos: quia &
gratorum ſit, non lucenti tantum ſuppli-
care ſoli, ſed occaſi quoq; meminiffe; &
præterea hoc pacto etiam Deo ſuis tribu-
atur honor, ſi, quæ ipſe è cælo munera
conceſſit orbi, debito cultu, etiam poſt-
quam rursus ſunt erepta, afficiantur: &
deniq; quia ad virtutis ſtudio viui non
fortius excitari poſſint, quã ſi laudem me-
moriãq; bonorum non cum ipſis mori
videant: quia hæc ita ſeſe habeant, pie
prudenterq; ſubducta ratione Academia
noſtra arbitrata eſt, turpe ſibi fore, ſi ſuam
illam, cuius hætenus tam diligens ſemper
cuſtos ac propagatrix fuiſſet, diſciplinam
con-

consuetudinemq; iam ipsa, negligentia
inexcusabili damnaret. Quam ob causam,
etsi à se grati hæc opera animi non exige-
batur, ipsa tamen sponte nuperrime de-
creuit, generosissimi, qui proxime fuisset,
Præsidis sui beatis manibus maximisque
virtutibus, solenni quadam oratione pa-
rentandum; & sic, qualemcunq; illustri-
bus eius meritis ex animo pio mercedem
esse dependendam. Atque hoc tam
laudabile negotium, vt ego nomine pu-
blico, adeoq; suas in eo vices agerem, Am-
plissimum mihi Consilium Academicum
iniunxit. Ego vero quanto id mihi honori
ducam, ore stiloque meo, si modo digne
possem, illum venerari virum, quem, quã-
diu vixit, felicitatis ac honoris mei certif-
simum expertus sum & autorem & fau-
torem, hoc profecto verbis satis exprime-
re non possum. Non prius, quam viuere
desiero, memoria mea excidet singularis
maximi Patroni in me beneuolentia.
quam non, vt fere genius hodie seculi
B con-

consuevit esse, in blanda fallacis vultus
specie, aut inani magnificarum promissi-
onum iactantia hæsisse; sed in intimis a-
nimi candidissimi visceribus fuisse fixam,
ipsa res indubitatis mihi testimoniis fir-
mauit. Certe, quantū DRAXDORFFIO,
ac cæteris, quos ille in illustri scholarum
regimine Collegas habuit, ob maxima,
quæ in me contulerunt, beneficia, obstri-
ctus fuerim, etsi nuper etiam hic publice
me dixisse memini; idem tamen rursus
dicere minime me piget: nec, quoties-
cunq; occasio sese offeret, vnquam repe-
tere imposterum pigebit. Nec propterea
verebor, ne fortasse apud bonas mentes
vitii istius, quod Rhetores *ταυτολογία* vocare
consueuerunt, reus agar; dum quæ mihi
bene facta sunt ab aliis, grata subinde me-
moriam ac prædicatione recolo. Et si vel
maxime verendum id haberem, mallem
tamen subire notam oratoris inficeti,
quam ingrati hominis. Sed quam hono-
rificum; tam grauem, qui mihi nunc
impo-

impositus est, laborem esse sentio. Et fortasse parum abest, quin & alii, cū audiunt, quid facere sim iussus, rem ita sint interpretaturi: infanti aptatos esse Herculis cothurnos. Quorum iudicium tale non sine ratione esse, agnoscere cogor, si magnitudinem viri, quem laudandū suscepī, animo meo repræsentō, & cum illa meam in dicendo cōparo infantiam. Tot enim sunt ac tantæ res, quibus præsentī se DRAXDORFFIUS noster seculo abunde commendavit, ut, quo suum illis apud posteros etiam decus pretiumq; constet, Ciceronem aliquem requirant. Qui tamen & ipse, si quid intelligo, nimio se obrui splendore; nec posse, quæcunque digna laude offeruntur, satis laudare omnia, necesse habeat fateri. Homini vero curtæ sibi in eloquentia supellectilis conscio, quid animi esse creditis, Auditores? Equidem videor mihi, dum virum, quem ut mors iam supra invidiam, ita supra laudem sua virtus posuit, prædicare

B 2

insti-

instituto, similis esse ei, qui nandi imperi-
tus nando agitat Oceanum superare. Sci-
licet arduum est, scribenda facere: sed,
iudice Sallustio, non minus arduum est,
facta scribere, eorumq; gloriam orationis
magnificentia exæquare; ne quæ laudare
aggrederis, impari stilo facias minora.
Quod si, ipso audiente, cuius decora iam
sunt exequenda, defungi mandato mihi
officio liceret, magna profecto, qua me
sic vrgeri video, solitudine leuaret.
Neque enim dubitarem, quin viri mode-
stissimi, & quo ipse fuit præditus, cando-
rem in aliis quoq; æstimantis genio facile
litare possem. Dicerem simpliciter sine
anxia vllius pompæ aut apparatus cura,
quæ pietatis mihi impetus dictaret: nec
vererer, ne propterea audientis cōtrahe-
rem offensam; quin crederem potius, ora-
tioni meæ apud illum ab ipsa simplicitate
sua gratiam conciliari. Nunc autem cum
dicendum mihi sit coram illustribus tot
ac

ac sapientissimis hominibus, qui omnes
orationem ab laudante materiæ suæ ex-
pectant respondentem, quorumque & o-
culis & animis, defuncti ceu adhuc vivi
imago obuersatur: periculum inde est,
ne sermonem meum, nisi ad expectatio-
nem sit, apud eos expropinquo recentis
exempli comparatio flagellet. Sed quic-
quid sit, dicendum est tamen, vt morem
geram illis, qui me dicere iusserunt. Si mi-
nus apte humeris meis impositum onus
fedeat, id excusandum relinquam illis, qui
imposuerunt. Interim ego faciam, quan-
tum valeo: & licet nude, dummodo fide-
liter, præcipua saltem, atq; è plurimis ex-
cerpta de DRAXDORFFIO narrauerò;
optime hoc pacto me, si nō laudasse virū,
at certe laude dignum ostendisse arbitra-
bor. Vos modo, Auditores omnium ordi-
num honoratissimi, linguis animisque
fauete: ac de viro eo, quem & natalium
splendor, & magnitudo animi, & pruden-

tiæ soliditas, & grauitas morũ, & laborum
pro republica exantlatorum diuturnitas,
& amplitudo meritorũ, paucis, quem vitæ
& mortis generositas omnibus venerabi-
lem atq; augustũ fecerat, mihi nunc verba
facere cogitanti, lubentes, quæso, ac bene-
uolas præbete aures; & quod eloquentiæ
meæ deest, fauore ac eruditione vestra
supplete.

Atq; ab initio quidem, si quæ multis,
eadem mihi quoq; opinio federet, ac si nõ
minus ad præcepta rhetorum sequenda
orator, quam aliquis Romanus olim ad
leges Iulias aut Cornelias obstrictus sit:
cuius superstitionis vanitatem cordati
viri egregie derident pariter ac damnant;
quippe qua franguntur ingenii libertas,
& eloquentiæ spiritus: magna sermonis
pars iam consumenda esset recensendis
iis, quæ ad DRAXDORFFII ortũ, patriam,
parentes, auos ac maiores pertinent. Et
sane si solem satis per se lucentem facibus
non

non necessariis cogitaremus adiuuare,
amplissimus nobis dicendi campus hic
sefe aperiret. Sed cum, qua Beatus Hiero-
nymus vtitur similitudine, in fructibus ac
ramis arguat defectum, si recurrendū sit
ad truncum ac radicem, vt horum fœ-
cunditate sterilitas illorum cōpensetur:
eam ob causam & mihi superuacaneum
videtur, prolixè laudes Nostro ab auis
etiam atq; atauis, & omni retro nobilita-
te arcessere velle: qui propriis ita decori-
bus effulget, vt alienis minime indigeat.
Certe s. Senecā, & in vniuersum Stoicos
consulamus, quemadmodum de cæteris,
quæ alii corporis ac fortunæ bona solent
appellare, ita & de patriæ ac generis gloria
tacere nos iubebunt. Omnia enim talia
Philosophi isti, qui longe supra alios sibi
sapere videntur, pro solita loquendi ma-
gnificentia, non censu solum, sed plane
etiam nomine bonorum excludunt exu-
untq; ; omnem felicitatem hominis ac
laudem, in ipso ac virtute sola collocātes:
ad

ad quam ista nec cōferre quicquam, si ad-
sint; nec si absint, eandem impedire aut
labefactare queant. Aristoteles autem,
& qui eius Scholæ nomina dedere, in di-
uersum hic abeunt: & quamuis negent,
eiusmodi bonis extra hominis animum,
positis, cōstitui virtutem; multū tamen cū
adiuuari tum illustrari contendunt. Itaq;
minime abhorreat à Lycæi placitis, si quis
asserat, res externas virtutis esse vel tubos
& canales, quibus propagetur; vel oppor-
tunitates, quibus stimuletur; vel instru-
menta, quibus vtatur; vel subsidia, quibus
alleuetur: aut si idem sub alio schemate
dicendū sit, esse quasi obstetrices, quibus
edatur in lucem; nutrices, quibus edu-
cetur; adiutrices & commendatrices,
quibus ad actionem & vigorem; ad gra-
tiam & laudem; ad splendorem deniq; &
gloriam prouehatur. Atq; hæc sententia
etiam cum diuinæ menti, quæ, quos de-
creuit magnos facere, eos huius generis
ornare atq; instruere bonis cōsuevit; tum
com-

communi sensui, atq; adeo ipsi experien-
tiæ quotidianæ maxime est conueniens.
Nam, vt forte vnus è veruecum patria,
(liceat mihi Iuuenalis verba mutuari)
prodierit, qui magnū dederit exemplum:
non tamen sapius id euenisse cernimus.
Vnus, quem scimus, est Democritus,
Abderæ natus, cui innatum ciuibus reli-
quis stuporem natura melior deterferat,
Atq; hic in Protagoram deinde, cui obti-
gerat præceptor, sapientiam suam deriuauit.
Absq; quo fuisset, gentilis Abderitarū
vecordia cum cæteris & Protagoram in
æternam infamiam aut obliuionem abie-
cisset. Sed nec facile vel deformis Ther-
sites, pulchro corpore Agamemnonem;
vel perditianimi Catilina pium in patriā
Ciceronem; vel ignauus Sardanapalus
Alexandrum aut Hectorem aliquem pro-
creabit: vel si maxime id fiat, albi corui,
aut prodigii instar erit. Nimirum amant
creari similes similibus; &, vt poëta lo-
quitur, æquilæ aquilis, fortes fortibus.

C

Qua-

Quare mediam ego tenebo viam; & nec
nihil dicam de genere ac patria nostri
DRAXDORFFII, nec dicam omnia, quæ
dici possent: sed, ut ex vnguibus leo æsti-
mari possit, pauca seligam explurimis.
Annus igitur Christianorum supra mille-
simum & quingentesimum erat nonage-
simus & quartus, quo carum illud à cælo
pignus rebus humanis commodatum,
cum primū lucem aspexisset, & parentes
generosos in gaudia, & in omnia futuræ
magnitudinis Alsatiam erexit. quo ipso &
Galliæ nouum sidus illucescens, Henricus
Magnus dignum suæ virtutis præmium,
cum Lutetia Parisiorum, aliisq; vrbibus
quam plurimis, imperii insignia Carnuti,
ritu solenni recepit. Sed eiusdem anni
faustitatem præterea commendarunt &
nobilis aduersus Hispanos in Belgio Mau-
ritii Nassouii victoria; & arx Nouogradi
in Hungaria è Turcarū manibus virtute
Christianorū erepta. Æquum enim erat,
natale illius tempus tot rerū prosperarum
euen-

eventibus insigniri, cuius ortus occultum
in tam multos sese diffusuræ felicitatis au-
spicium continebat. Sic Alexandrum,
quoq;, illud Martis fulmen, ac domito-
rem orbis, suam aliquando suæque gentis
gloriam rebus gestis illustraturum esse, tot
læti vndique, eo ipso tempore, quo natus
erat, ad patrem eius Philippum confluen-
tes nuncii portenderunt. Sed cum desti-
natus esset Argentoratensis Reip. decori
ac vñsibus DRAXDORFFIUS, ecce, & hic
fortuna prouidit, vt in pago veluti subur-
bano nobis primum Alsatix aërem; &
cum temperie eius, temperiem simul ani-
mi; deniq; illum aduersus Argentoratum,
quem nunquã postea deposuit, amorem
& affectum benignissimũ hauriret. Non
enim amplius, quam vnum milliare ab
Argentorato distat Wantzenauia: in cuius
arce in hanc lucem fuit editus ille Noster,
nequaquam degener stirpis generosæ
furculus. Neq; enim primus in familiam
suam nobilitatis decus intulit, sed inuete-

C 2

ratum

raturum multorum seculorum decursu à
maioribus acceptum indole æquavit,
virtute auxit, gloria absoluit. Quare ve-
re suum approbavit genus. Nam quod
DRAXDORFFII, splendore imaginum
suarum, quas in longa retro tempora nu-
merare possunt, non segne otium velare;
sed pro se quisque suæ gentis honorem
factis egregiis extendere, in more positū
habuerint: id pro me Annales populo-
rum loquantur. In his, omnibus tam
pulchro spectaculo fauentibus, Iodocus
DRAXDORFFIUS, sub duce Christo-
phoro Wilhelmo, Hassiæ Principe, cū hic
sub finem seculi decimi quinti, mille e-
quites Imperatori Romanorū, Friderico
Tertio, in Hungariam auxilio adduxisset,
cum aliquot aliis, & ipsis nobilitatis ac
virtutis spectatæ iuuenibus, eiusdemque
gloriæ æmulis, profligata, quæ vrbi suc-
cursura venerat, hostili manu, primus in
Albæ Regalis muros euadit, pugnat, vin-
cit, eamque pristino iuri suo ac domino
re-

restituit. Vitus vero DRAXDORFFIUS,
acerrimi Vir animi, auspicio Georgii, post
Alberti patris obitū, Saxonum ducis, cum
duobus in Frisia occidentali collegis,
Ezardo Frisiæ orientalis, & Hugone Leis-
nici Comitibus, qui simul cum ipso copiis
præerant, Groningam caput regionis,
obsidione operibusq; cingit, cōmeatibus
intercludit, & fame tandem ad deditio-
nis consilia adigit. Itaque non satis fuit
DRAXDORFFIIS genere esse nobilibus,
nisi operibus etiam ipsi sese nobiles
ostenderent. Parui enim æstimabant, ma-
iores in gloriam vixisse suam; nisi & ipsi
vicissim in gloriam illorum viuerent, &
honorem ab illis acceptum pari honore
reddito pensarent. Vnde non mirum est,
quod facilis semper aditus ad Principum
amicitias viris tam fortibus patuerit: à
quibus ad splendida aulæ ministeria, aut
munera alia euecti, fide atque industria
omnium amorem gratiamq; meruerunt.
Cuius rei exempla enumerare iam non

attinet: ne tempus rebus maioribus debi-
tum occupemus. Atq; ex illustri hoc
stemmate, quod aliorum quoq; nobilissi-
morum fulgore stemmatū exsplendescit,
quibus per matrimonia atq; affinitates est
innexū, ortum Noster suum, & cum hoc
nobilitatis virtutisq; hæreditarium decus
habuit: natus Patre IOANNE CHRI-
STOPHORO DRAXDORFFIO, Matre
VRSULA IOHMIA: è quorum parentum
suorum generoso sanguine ille sua stirpe
dignissimus animus succreuit. Multum
debuerit Genitori huius Argentoraten-
sis è domo Brandenburgica Episcopus, cuius
præfectus fuit in Wantzenauia: multum
debuerit eidem Dux eo tempore Wür-
tembergicus, cuius postea supremus in
Oberkirchensi dynastia administrator
fuit: multū, inquam, Serenissimi hi Prin-
cipes debuerint Parenti Prætoris quondā
nostri: tantum tamen non debuerunt,
quantum debet Argentoratū: cui filium
illum suum genuit atque educauit. In
hoc

hoc enim adhuc puero, cum indiciis manifestis indoles excelsa, & ingenium acre sese proderent, illos virtutis igniculos bona disciplina tum suscitandos, tū etiam perficiendos esse, prudenter de salute sibi tam cari pignoris sollicitus pater statuit. Itaq; vt in pietate erga DEum ante omnia, ac deinde etiā in bonis litteris moribusq; erudiretur, Argentoratensi Gymnasio concreditus est. Vbi per omnes classes studia traducens, ita suam Præceptoribus diligentiam ac probitatem adprobauit: ita clare inter condiscipulos generosos, laudis eiusdem cum Nepotis Attico particeps exsplenduit; vt iam tum spei, in quam genitus erat, robur ac fulcrum supponere cerneretur: hoc est, vt iam tum omnes non sperare solum, sed etiam confidere possent, eum aliquando futurum esse talem, qualem deinde euasisse maximo cum gaudio viderunt. Conueniebat quippe, vt, qui ad reip. clauum aliquando sessurus erat, pectus ante artibus ad fortunæ

tunæ illius cultum pertinentibus præpararet ac muniret. Mitigat naturæ ferociam doctrina, docetq; impetus modum transgredi gestientes habere in potestate: à quibus, qui nunquam litauit Musis, nec prudentia cupiditates suas didicit circūscribere, facile in transuersum abripitur. Quam ob causam nō statim, vbi Gymnasio exemptus erat, telam studiorū abruptit: sed Academicorum Professorum ductu, quos præter maiores suos etiam doctores habere volebat, vastissimum scientiæ Oceanum visere, inq; altum eius prouehi gestiit: sed tamen, quod esse difficillimum prudentissimus historicorum arbitratur, cum Agricola ex sapientia modū tenens, flagrantem animum coercuit: reputans, nō scholæ, sed vitæ ac reipublicæ discendum sibi esse. Igitur ex omnibus scientiis, vt fortunæ ac proposito suo maxime conuenientes, elegit doctrinam ciuilem ac historiam: quarum illa futurum ciuitatis Rectorem præceptis, hæc exemplis instruit;

struit; illa format, hæc perficit, ac absol-
uit. Cupido autem, quæ celsarum natura-
rum propria solet esse, nobilissimum
animum stimulabat, regiones etiam alio
ab sole calentes visendi. Apud Curtium,
autorem æternitatis suæ, quam ardet A-
lexander omnes orbis terrarum, quem
imperio suo destinarat, lustrare partes; eas
in primis, in quibus res vetustate aut alia
ratione memorabiles reperiri cognoue-
rat? Certe vix temperat sibi Pellæus ille
Iuuenis, quin etiam maxima belli mole
ceruicibus incumbente, non in Ægypti
modo à se deuictæ interiora; sed in Æthi-
opiam plane Memnonis Tithoniq; regia
inclutam progrediatur: quanquã melior
deinde ratio hanc tum intempestiuam
eius cupidinem, flexit ac repressit. Ab eo
tamen proposito, quo Oceani ingenium
ipse experiri statuerat, nullis periculis se
deterreri fuit, quadraginta in altũ stadia
progressus: nec nisi voti sui cõpos ad ea,
quæ restabant, peragenda rediit. Eâdem

D

subli-

sublimis ingenii nota, Tacitus prodit Germanicū veteres locos & fama celebratos noscendi fuisse cupidissimum. Sic & DRAXDORFFIUS noster, vt mentem, eruditione, animū prudentia, mores elegantia, totū se illis artibus, quæ futura eius magnitudo videbatur postulare, magis expoliret ac perficeret; Galliam, Angliam, Italiam, quin & Siciliam, igniuomo Ætna suo nobilem, aliasque regiones perlustrauit; non, quæ pluriū hodie consuetudo est, otiosus solum urbium atq; ædificiorum spectator; sed ingeniorum potius ac morum, quibus inter se differunt populi; maxime vero, quibus respublicæ gubernantur, formarum modorumque obseruator diligentissimus, explorator sagacissimus, arbiter subtilissimus. Neq; enim in eo aliquod ponebat pretium, quod vidisset; nisi quæ viderat, pulchra imitari, vitare turpia, motus exemplorum efficacia studeret. Plurima autem profundo in pectore, tanquā in tuto aduersus
fortu-

fortunam thesauro, reposuit: quæ deinde
ad motus reip. maxima huius cū vtilitate,
& admiratione sui, depromere, atque ad
præsentes vsus earum rerum, quæ in ma-
nibus erant, sciuerat transferre: plane
dissimilis eorum, qui peregrinationes su-
as ad nihil aliud, quam ad inanes nugas,
quibus aures audientium obtundunt; &
non raro ad mendacia etiam, quibus apud
rudes ac ignaros, heu quam miseram glo-
riam! aucupantur, referre didicerunt.
Sed præter solidam istam ac præcipuam
suscepti itineris mercedem hoc etiam,
ceu additamentum aliquod haud sane
contemnendum, domum secum repor-
tauit, vt peregrinarum imbutus notitia
linguarum, nec ipse barbarus aliarum na-
tionū hominibus videretur, & sine inter-
prete adhibito, cum iis agere quæ vole-
bat, & commode quæuis tractare negotia
calleret. In primis tamen Italicus sermo,
inter delicatam nimis Gallici mollitiem,
& affectatum fastum Hispanici, medium.

tenens, atque ad decentem grauitatem exactus, amorem eius studiūq; sollicitauit ac pellexit: quo eum prompte ac scite admodū vtentem sunt qui non sine stupore sæpius se dicunt audiuisse. Enimuero non animum, non linguam solum; sed corpus quoq; vel officiis bellicis, vel gratiæ ex decente statu flexuq; consequendæ reddere habile ac versatile, inter reliquas peregrinationis curas habuit. Hinc vidisses illum quam scitissime lanceam militarem quaterere, & extrema sui parte prehensam, ab humo, sed facili, atque oculos fallente nisu alleuare; alleuatam in altum iacere; iactam, manu non errante iterum excipere; interdū & per volam, in offenso celeriq; lapsu transmissam, & iam iam elapsuram tempestiue cōpressa manu inhibere, ac tenere. Vidisses, equum à dextra sinistraue parte infilire: & vel in saltum excitare, vel flectere in gyrum ac rotare, vel admittere subditjs calcaribus, admissumq; subito retinere; vel deniq; sclopo
pro-

propius exploso ad belli vsum assueface-
re: ante omnia vero eius indolem ac no-
tas, animo, oculis, interdum & admota
manu arbitrari. His ac similibus exercitiis
aliis iuuenem nobilissimum vidisses de-
lectari. quibus tamen, vtpote sapiens tem-
porum dispensator, non nisi eas tribuebat
horas, quas ab seriis occupationibus libe-
ras ei quies labore alternata concedebat.
Nam ne succisuum quidem istud otium,
vel comessionibus, vel aleæ, multo mi-
nus voluptatibus aliis, ad quas irritandas
illiciendasq; nihil quam regiones, in qui-
bus tum versabatur, est instructius, domi-
nus suarum cupiditatū, perdere sustinuit.
Aduersus Vlysem, variis illum casibus ac
periculis iactatū Græcum, Poëtæ fingunt,
quia Mineruam itineris sui comitem ac
moderatricem haberet, nihil nec vastum
Polyphemi robur, nec Scyllæ Charybdisq;
gemitus horribiles, nec blandos Sirenum
cantus, nec mutandis formis præparata
pocula Circes, nec deniq; ferrea inferorū

D 3

iura

iura quicquam valuisse. Per omnia ista
monstra, pericula, insidias, Deæ suæ axilio
incolumis ac victor Ithacensis ille in pa-
triam reuersus est. Quod Vlyssi Minerua,
id Pietas ac Prudentia multo verius
DRAXDORFFIO fuerunt: qui itidem
triumphatis populorum ac seculi vitiis
redux, ingenti & suos gaudio, & omnes
spe impleuit: eos vero, qui peregrinando
non meliores, sed deteriores facti, huius
stultitiæ suæ meritas luebant pœnas, dedit
in ruborem, & seriam, sed quæ fera esset,
male actæ vitæ pœnitentiam. Et cum tales
hî experirentur, se & animis & corpori-
bus corruptos ac fœdatos, quales tamen
vt essent, toto fere illis patrimonio suo
constitit: ipse nullius sibi peregre admissi
consciis flagitii, & mentem puram Deo,
& pudorem illibatum attulit in matrimo-
nium. Et remuneratus est Deus, lege tam
seuera custoditæ decus castitatis, faustissi-
mis, quæ in cælo destinauerat ipse sanxe-
ratq;, coniugiis tribus. quorum quodnam
cate-

cæteris, vt magis optabile præferret, ipse,
dum viueret, felicissimus maritus apud se
non poterat statuere. Postquam enim pri-
mam thori fortunæq; sociam è nobilissi-
ma Voltziorum familia oriundam, ingens
suæ domus, quã antea virtutibus illustra-
uerat, ornamentum, inuidia mortis ipsi
ademisset; eam altera, & ipsa genere doti-
busq; nobilissima, Zornia; hanc deinde
etiam ereptam, ea, quæ superstes adhuc
memoriam optimi coniugis luget, nobi-
lium fœminarum illustre decus & abso-
lutissimum exemplar, patris generosi,
Geispolsheimii Lauterensis generosa fi-
lia; adeoq; vna simul vxores duas bis iam
viduo egregie, atq; ex asse restituit: postu-
mum virtutis a marito, ac proinde morte
confirmatum testimonium consecuta:
cuius bonorum partem haud sane con-
temnendam testamento sibi legatam, qua
tamen, si liceret, virum redimere mallet,
hoc suæ fidei obsequiique præmio dignissi-
ma Matrona possidet. Plurima, si cui ædes
no-

nostri iam Cælitis contigerat intrare, familia bene institutæ & cōpositæ indicia occurrere solebant: nullū autem inter omnia iucundius quam hoc, quo intelligebatur, sedem ibi suam habere concordiam cōiugalem. Hac maritus curas reip.; hac vxor curas familiae solabatur. Cæterum, vt consuevit Deus immortalis felicitatem hominū sibi carissimorum aliqua etiam calamitate adspargere; ita hic, quod in coniugiis gaudium potuisset consummare, vel omnino dare negavit, vel datum nimis celeriter repetiit. Sobolem intelligo, Auditores. nam licet filiis duobus ex coniuge secunda, itemq; vna filia susceptis, dulcissimum patris nomen induisset; hæc tamen ei lætitia vel nulla, vel minus certe diuturna fuit: quia filii in lucem editi, lucem in ipso statim partu defuncti nunquam viderant: filiolum autem tenellulam, postquam nō amplius quam sex vixisset menses, turbato ordine naturæ, tristissimus pater funere acerbo extu-

extulit. Destitutus liberis, pro liberis, quos
debuerat, curas, labores, opera suscepta
pro rep. ac prospere effecta Argentorato
suo imputavit: Thebano Epaminondæ
similis. qui & ipse, cuidam sibi orbitatem
exprobranti, cum sobolem corporis ne-
quiret, sobolem virtutis longe nobilio-
rem, pugnam nempe Leuctricam, magna
cum fiducia ostendit: qua & patriæ & sibi
æternitatem peperisset. Vt enim Epami-
nondæ, Thebæ; ita Argentoratum,
DRAXDORFFIO theatrum datum erat,
satis profecto amplum, satisq; opportu-
num, in quo illustribus virtutem suam
exhiberet documentis. Qua in re gratu-
lari conuenit cum DRAXDORFFIO,
tum patriæ nostræ: illi, quod inter Argen-
toratensis rei Atlantes iam etiam nume-
ratur; huic, quod consilio ac præsidio
tam prudentis viri fortunam suam tam
diu sustentauit. Quæ profecto peccat, nisi
coelestem pro se curā in hoc etiam agno-
scat, quod nunquam sibi optimi Rectores

E

de-

defuerunt. Aucta igitur tam nobili ciue
Argentoratum, statim ei in Minorem,
quem vocant, Senatum cooptato dedit,
quod ageret. Gradu enim, non saltu ad
summa dignitatum fastigia, ex instituto ac
disciplina huius vrbs, est progressus.
quod quemadmodum in bello plurimi
solet æstimari; ita etiam in ciuitate cum
ad gloriam, tum experientiam atque in
tractandis negotiis dexteritatem colli-
gendam, vsum habet maximum. Itaque
proximus quisq; honor ei sequentis fuit
rudimentum; vt, crescente cum ipsis
dignitatibus prudentia, præparatior sub-
inde aptiorq; ab inferiore munere ad su-
perius transfret: donec eo tandem euasit,
vnde altius ascendere non posset. Hinc
venit ei, quod cum Cicerone ad dandum
consilium caput esse arbitramur, tam ac-
curata, tam prompta suæ reip. notitia: qua
omnium in ea iudiciorū consuetudines,
ac leges; collegiorum functiones ac ne-
gotia; magistratuum officia ac munia;
ma-

maiestatem Senatus, & maiestatis partes
ac momenta; denique vniuersæ ciuitatis
iura, priuilegia, constitutiones, mores, ge-
nium, atq; adeo omnes, quibus publica
eius vel commoda, vel damna in nexa cō-
tinentur, rationes, non aliter quam dili-
gens paterfamilias, suæ domus, ad vsus
præsentissimos cognitæ perspectasq;, &
veluti in numero habebat. Nullus
enim muneris, quod quidem splendori
natalium eius competebat, nullus inspe-
ctionis, nullus curationis, præfecturæ
nullus, nullus cuiuscunq; dignitatis titu-
lus cum honore hac in vrbe nominatur;
per quem ille non ad illius gloriæ sum-
mam, in qua tandem collectis vndique
laudibus fulgentem atque eminentem
cum veneratione videramus, auspicio
læto, successu prospero, euentu optato
profecerit. Senator fuit, sed sanctus, &
iustitiæ obseruans: Vigintiunumuir fuit,
sed cōmunium negotiorum intelligens:
Quindecimuir fuit, sed reditus atque

E 2

ex-

expensas publicas æque ac priuatas admi-
nistrandi peritus: Tredecimuir fuit, sed
qui Reip. statū, arcana, vtilitates, & præter
pacis, etiam belli artes & consilia, animo
cōprehensa, iudicio subacta, prouisu dis-
posita; sermone etiam, quotiescunq; res
postulabat, in mediū proferre, ac tempo-
ribus casibusq; solerter aptare didicisset.
Sed & Senatui maiori, in quem iam ante
quater sine titulo Prætoris adscitus aut re-
petitus fuerat, nouem deinde vicibus
Prætor; Academiæ autem, aliquanto am-
plius, quam viginti ac septem annos, Cu-
rator; vtroque maxima cum grauitate
præsedit. Quorum ille edictis suis tantū
nominis splendorem; hæc tantæ autori-
tatis auspiciū actibus suis & præscribi
& inperiri, summopere latabantur, atq;
in præcipua suæ felicitatis parte numera-
bant. Nam ab vltiore minores etiam ac
secundarias, quæ maiorū quasi quædam
sunt appendices, siue inspectiones, siue
præfecturas enumerādi opera me liberat
cum

cum instituti mei ratio, qui minutissima
persequi nec volo, nec possum, ne in ma-
iorem oratio modum excrescat; tum Re-
ctorii Programmatidis diligentia, in quo
accurate ista talia leguntur consignata;
tum vero maxime, quod supernacaneum
esse videtur, laudis argumentum etiam
a leuioribus petere, cum gloria rerū lon-
ge maiorum illam vel contineat vel ab-
sorbeat. In vniuersum dixisse sufficiat,
DRAXDORFFIUM muneribus istis o-
mnibus functum esse, solerter, diligenter,
feliciter; &, quo tota laudis summa cō-
prehenditur, bene. Ex qua variarum
functionem multitudine, quæ amplitudo
meritorū fuerit, facile, vt opinor, intelli-
gitis, Auditores. Sed eandem temporis
etiam longitudo extendit pariter & sin-
gulari nota facit memorabilem. Ex eo
enim tempore, quo primū rempublicam
capessere cœpit, continue per amplius
quam annos quadraginta eius tractationi
vel negotiis inuigilauit: exemplo sane

E 3

rarif-

rariſſimo; ſed cuius admirationem auget
indefeſſæ conſtantia indiſtriæ; quæ adeo
non mora frangi vnquam ſe paſſa eſt, vt
ab hac ipſa nouos ſubinde ſpiritus conci-
pere videretur. ne in otio quidem otioſa,
ſed, quæ in publico ſciret agenda eſſe, do-
mi prius meditari, & perpendere ſolita;
ne in coſta deinde expromere deprehen-
deretur. Vt enim cautus eſſet ac lentus in
deliberando, non præceps ac temerarius,
profunda eius prudentia faciebat. Scili-
cet varios, qui hinc vel inde emergere
poſſe viderentur, caſus euentusq; ſecum
reputans, cunctari, quam ruere malebat.
Qua circumſpectione plus quam audacia
confici; & hominem fieri optimum, vere
ſapientes ſtatuunt. Sed nec ſuæ opinionis
peruicax erat, vt vel ex ſuo ore cæteros
omnes vellet ſapere; vel omni, quod non
ipſe attuliſſet, conſilio aduerſaretur; vel
id, quod ipſe reperiiſſet, ſolum, aut ſaltem
optimum duceret. Intelligebat quippe
vir ſapientiſſimus, ne ſapientiſſimis
qui-

quidem semper in mentem venire, quod
opus sit: quos propterea recte facere, si
alterius interdū melius inuentis obtem-
perent: in quo secunda prudentiæ laus
consistit. Minime tamen se, ut neruis alie-
nis mobile lignum, duci agiq; passus est.
Nam, ut superbi esse, cum Æmilio Liuii
existimabat, de sua vnus sententia omnia
gerere velle: ita existimabat esse incōstātis,
ab aliena libidine fluctuantem pendere.
Et, quod caput rei est, nō priuata, veri cōsi-
lii venenū istud; sed publica vtilitas, veluti
suprema lex, in omnibus eius consulta-
tionibus ac sententiis principem habebat
locum. Scilicet Argentoratum ei suum,
quam ipse sibi, carius fuit. Pro hoc vigi-
lare, laborare, omnia agere; deniq; curis
immori voluit, suæ ciuitatis amantissi-
mus pater: contempsitq; honores atque
opes maximas alibi ostensas, præ ciuili
dignitatis cultu habituq;; ne se nobis ma-
gno cum nostro & damno & mærore
subtrahere cogeretur. Quod firmum
eius

eius propositū non infregit aut turbauit
beneficium atq; honor amplissimus, quo
spectatæ, quam in eo animaduertat, vir-
tutis excitata lumine, veneranda Stepha-
nici Cœnobii Antistes eū auxit ornauitq;
dum Aduocatum ac vicarium sibi supre-
mumq;, qui Wangenheimii ius diceret, Iu-
dicem adsciuit ac cōstituit. Hoc, inquam,
quippe quod & ipsum ratione quadam
ad rem Argentoratensem pertinet, nihil
impediuit, quo minus in solita pro bono
publico cura, in solito erga ciuitatem su-
am amore industrius optimusq; ciuis per-
seueraret. Qua pietate in patriā, ad parem
erga se pietatem obligauit vniuersos:
quippe quem præter istud & Principem
Senatus non dignitate solum, sed tandem
etiam tempore gestæ reip. esse cernerent:
imo quem cernerent, longissimo & vitæ
& rerum vsu Urbis esse Nestorem: ad
cuius prudentiam absoluendam con-
currerant, & ingenii bonitas, & tempo-
ris diuturnitas, & varietas negotiorum.

Vnde

Vnde factum, vt multi, cum in ciuili actu
res perplexa aut non quotidiana occurre-
ret, ad eum adire; ex eo, quid faciendum
esset, quærere; & sibi de eo, quod audiuis-
sent, solerent gratulari. Erat enim qui-
dam quasi cōmunis cum iuris, tum utili-
tatis publicæ consultus: quem ab expe-
rientia promptius consilium impetrare
videres, quam ab omni eruditione sua
illos, qui, quia sola librorū lectione confi-
dunt, interdum leones vulpibus, aut
aquilas noctuis iungi posse vana persua-
sione opinantur. Non autem ciuilem
viri peritiam vel cancelli curiæ, vel vrbis
mœnia coercebant: quin illa per orbem
vniuersum se diffundens, & consilia &
negotia pacis bellique, & iura, quæ inter
populos vniuersos intercederent; in pri-
mis autem ea, quibus Imperii Romani
membra essent connexa & sibi mutuo
deuincta, cōplectebatur, ac diligenti qua-
si custodia in temporum vsus asseruabat.
Sed nec aulicæ, vt ita loquar, philosophiæ
F exper-

expertem illū dimiserat olim Io. Georgii
Brandenburgici, Episcopi tum Argentora-
tensis aula: in qua aliquandiu versatus di-
dicerat omnia, quibus Princeps colendus
demerendusq; esset, officiorum obsequi-
orūq; genera; omnes, quibus elegantiarū
arbitris placere posset, comitatis dispen-
sationes ac modos; omnes, quibus ad ne-
gotiorum expeditionem votumq; veniri
posset, insinuationis artes & cuniculos:
ita vt, si vel fors vel voluntas eius ipsi vi-
tam in aula viuendam imposuisset, aulici
personam, quippe qui totū aulæ genium
cognitum haberet, egregie decenterque
agere ac sustinere potuisset. Sed cum
dico hoc, nequaquam intelligo dolos,
quorum in aulis regnum est. a qui-
bus vt magis quam a cane aut serpente
Noster abhorrueit, multis adfirmare ver-
bis minime est opus. Nemini simplex
illud hominis non natione magis quam
candore Germani pectus, secunda ubiq;
de eo fama ignotum esse fuit: & si
non

non fama, ingenua tibi facies, atq; index
animi sermo ostendisset. neq; enim vultu
aliud præ se ferebat, aliud premebat pe-
ctore: neq; sermo eius ab animo dissen-
tiebat. Antiqui moris fideiq; tenax, quasi
rediuuius Cato, istam non in vestibus so-
lum ad vanitatem, sed etiam in verbis ad
decipiendos homines compositam luxu-
riam serio semper damnauerat. Et quem-
admodum in familiari, ita vel maxime in
eo sermone (de hoc enim vt iam loquar,
occafio me inuitat) quo de reip. negotiis
sententia dicenda erat, nec modum nec
dignitatem excedebat; nec adeo quic-
quam dicebat frustra: eloquentia instru-
ctus, non qualem in scholis suis rhetores
ab apparatu ac pompa; sed qualem in
medio rerum vsu & consuetudine nego-
tiorum natam educatamq; a neruositate
homines ciuiles æstimant. In summa;
fatis eloquentiæ habebat, cum Lentulo,
ad remp quod opus; & cum Lælio, quod
esset in rebus priuatis, amicis eius; in
F 2 rep.

rep. ipsius dignitati fatis. quod de duobus
Romanis illis, clarissimis olim viris, Cice-
ronis, in quo vno omnia eloquentiæ ge-
nera cōcurrerant, legitur in monumentis
eius iudicium. Ceterum humanitas &
mansuetudo animi, quibus virtutibus
pellegerat alios in amorem sui, & nō raro
duritiem contumacissimorū hominum
expugnat; non in moribus tantum &
gestu, verum in oratione quoq; ac voce,
sed sine mollitie, blandiebantur. Hu-
manus erat, sed sine auctoritatis detri-
mento: quam vbi res videbatur postula-
re, etiam expromere sciebat; cum alias
in subsidio potius, quam ostentatione
habere consueuisset: grauis erat, sed sine
suspensione arrogantiae: cui modestia in-
fusa omnem præcludebat locum. nec
terrebat, vt reuerentiam; nec adulabatur,
vt amorem captaret: facilis adeuntibus,
affabilis alloquentibus. Conciliauerat
enim inter se virtutes specie dispares.
Cu-

Cuius rei hoc tulit pretiū, vt visu audituq;
amabilis iuxta ac venerabilis, & inuidiæ
& vilitatis effugerit periculū. Affectuum
vero suorū dominus, iram nec facile con-
cipere; & si concepisset, statim dimittere;
non autem in futuras ultionis occasiones
abstruso in pectore seponere. Offensas
obliuiscendo condonare potius, quam
interpretando accendere. Et si quando
scelerum atrocitas, & vtilitas publica, ad
quam pœnas referendas esse norat, seue-
ritatem prouocarent, nec ingenio illum
suo malitia parentium vti pateretur; non
gaudere sanguine, nec suppliciis frui: ad
quæ decernenda non nisi inuitus, & ma-
gno cum tormento veniebat; nec ea nisi
magnis peccatis commodare. Nam de-
licta minora satius esse credebat venia,
interdum & verbis emendare, pœnitentia
vel deprecatione contentus: vt qui sem-
per in consilio clementiam, quam legum
asperitatem habere mallet. Quo tran-
quillo ac moderato potestatis vsu, & time-

banteum, & pro eo ciues sui: gaudentesq;
imperio non minus placido, quam iusto,
conciliatum magis quam imperatum,
obsequium præstabant. Quod pro boni
regiminis, & laudis inde enascentis supre-
mo, ad quem rector populi eniti potest,
quasi apice debet æstimari. Ne tamen
existimetis, Auditores, quam laudavi leni-
tatem, iustitiæ fortasse fraudi fuisse. Nefas
sit hoc de viro tam sancto cogitare. Non
tollebatur ius clementia; sed temperaba-
tur: nihil hic ambitioni, nihil odio, nihil
amori, nihil dabatur muneribus: aduer-
sus quæ inuictum eum & perpetuum
honestatis studium, & religio legum præ-
stitere: nam ne ipse quidem quicquam
sibi contra has permisit; ne custos idem
& contemptor earum videretur. Qui per
prona montis in cursum se dedere, cœptū
semel impetum sistere, non amplius in
illorum potestate est. Ita nec ego iam,
cum volo, enumerationem virtutum
Draxdorffianarum abrumpere possum,
dum

dum proximæ cuiusque mentio, nouæ
dicentem admonet, quam sicco plane
pede præterire non sustineo Dum narro,
quam potestate sua non abusus fuerit ad
cuiusquam iniuriam, aut pro libidine
agendi cuncta audaciam; simul, ecce,
mihi incidit, quam nec eandem habuerit
incitamentum superbiæ aut fastidii. a quo
illum vitio cōmunis omnium consensus
verissime absoluit. Cui enim vnquam,
quicquam cum illo negotii fuit (appello
vestram omniū conscientiam, Auditores)
qui elati super alios animi, vlla in re notas
potuerit animaduvertere. Neque enim
dominum, sed patrem; nec seruos, sed
ciues cogitabat: inter ciues ciuis, prin-
ceps inter principes; nonnunquā ciuem
ac principem miscebat: fortuna, digni-
tate, auctoritate, virtute, inter cæteros
eminens; iure vero par. Nec iure solum
par, sed ne vitæ quidem cultu, aut saltem
minimum, a priuatis abhorrens. Ciuitas
in ædibus, in cænis, in tota familia ac disci-
plina

plina domus visebatur: eiusdemq; fidem
vultus, gestus, vestitus confirmabat.
Omnis apparatus, imo omnis species aberat
superbiæ. Ad quam gratissimam in
publicum lætissimamque & benignæ gu-
bernationis & modestæ vitæ rationem
non magis suæ ipsum ciuitatis, quam pro-
prius deduxit genius. Qui si in idem cum
Augusto ac Traiano potentiæ imperii que
fastigium sublatus a fortuna fuisset; pa-
rem cum tantis Imperatoribus laudem
DRAXDORFFIUS meruerat. quorum
modestiā, illius quidem Suetonius; huius
vero Plinius, vix inueniunt, quomodo
digne satis prædicent, atque documentis
illustribus posteritati cōmendent Quan-
quā ne sic quidem video, quia in minore
virtutem illam exercuerit materia, cur
propterea celeberrimis illis generis hu-
mani Reſtoribus cedere Noster debeat:
si quidem virtus æstimanda sit animo,
non fortuna. Certe si ad Stoam iudicium
huius rei deferas, secundum nos illa
quin

n
t.
e-
in
u-
m
ro-
m
ue
pa-
em
um
ius
do
tis
an-
ore
ur
u-
t:
o,
m
la
n

quin sententiam sit dictura, de hoc nō est,
quod dubitemus. Dum autem ita, quem-
admodum dixi, sese submittebat, creuit:
dum se vt Prætorem, & pariter vt ciuem
gerebat; ciues eum vt Prætorem sunt
venerati, vt ciuem amauerunt. Ac ne for-
te existimes, ad speciem aut ostentatio-
nem tales tantasque, quibus magnus Vir
eluxerat, compositas virtutes fuisse, con-
stans ac perpetuus ipsarum tenor verum
iis æternumque pretium constituit. Ad
quam totius vitæ æquabilitatem pertinet
etiam sobrietatis, & in permissis quoq; ac
vsitatis voluptatibus temperantiæ studiū.
quod nec peruersa sæculi consuetudo,
qua nonnullos alias haud sane malos
nonnunquam videas abripi; nec, quas
non parca manu in illum fortuna contu-
lerat, opum irritamenta interpellare aut
conuellere potuerunt. Odio habebat ex-
quisita ingenia cænarum, & mensæ luxus,
qui profusis sumptibus exercentur; in-
primis vero solennia iam certamina
G biben-

bibendi, & poculorum quasi bella, quibus
vinum pro salute aliorum, in damnum sui
corporis, modo non etiam animæ, effun-
ditur. Sed & commode, quam splendide
habitare præoptauit; modumq; supelle-
ctili fecit ac familiæ: gaudens virtute, non
externis hisce cenferi. Pecuniæ nec appe-
tens, nec prodigus, eam ad elegātem, non
affluentem aut sumptuosam cultus do-
mestici viræq; in publico agendæ mundi-
tiem; quin & ad paupertatem aliorum
subleuandam consolandamq; dispensa-
uit: non minus & vir & ciuis, & pater fa-
miliæ bonus, quam Pomponius ille Atti-
cus: cuius gloriam multis virtutibus
æquauit, multis etiam superauit. De hoc
suo Attico Cornelius Nepos prædicet,
quod in suos fuerit indulgentissimus:
dummodo eandem laudem in Nostrum
etiam quam maxime constet conuenire.
Nisi quod pluri Noster æstimandus est:
quippe apud quem, pietatem in necessi-
tudines pietas in patriam; hanc pietas in
De-

Deum non fucata, sed vera præcucurrit.
quæ reliquarum virtutum ceu dux, & ma-
gistra, & moderatrix complementum illis
& quasi vitam addidit: imo sine qua reli-
quæ omnes, quantæcunq; etiam videban-
tur, vanæ fuissent ac nullæ. Ex animo,
dixi, non ad ambitionem, neque ad domi-
nandi vsus pietatem ei cultam fuisse.
neque enim huic quicquam tam contra-
rium esse arbitratus est, quam sanctissi-
mū eius nomen, quo multi hodie passim
in orbe hoc terrarum, ceu summo pru-
dentiaæ arcano vtuntur grassanturq;, vel
pro velamento vafricie, vel nocendi in-
strumento habere. Et cum Christianus
esset, nihil Christianæ disciplinae à se pu-
tauit alienum. Hinc est, quod de Deo
optime existimare, pura illum castaque &
voce & vita venerari, curæ ei fuit. quem
optimum pulcherrimumq; esse cultum,
qui Deo exhiberi possit, etiā gentes olim
agnouere. Hinc, quod precibus quotidiana-
nis ac votis cælum sibi suæque ciuitati

conciliare nunquam intermisit. Cuius
fauor in omnia deinde eius & consilia &
actiones, deniq; in ipsam reip. salutem in-
fluere, manifestis documentis deprehen-
debatur. nec quicquam vel cogitabat, vel
aggrediebatur, quin Deum suum in par-
tibus, adeoque in auxilio operis haberet.
Æquum proinde fuit, vt qui nihil sine
Deo ageret, diuini etiam auspicii fructum
prospero rerum omnium successu euen-
tuq; reportaret. Vniuersum vitæ tempus
Deo & reip. impendit: quibus seruire,
existimabat esse viuere atque imperare:
nec aliud inde præmium quæsiuit, quam
vt placeret Numini, & prodesset ciuitati:
pro cuius bono quæ gessit, ex iis solas cu-
ras ac molestias sibi reseruauit; cætera
aliis indulgit. Vidimus hætenus, Audito-
res splendidissimi, DRAXDORFFII ani-
mum pium, sanctū, pulchrum, cœlestem,
ac certissima originis suæ iaculantem do-
cumenta. Videamus etiam, quam conue-
niens tanto hospiti domicilium hoc in
orbe

orbe Deus & natura dederint ; corpus
erectum, procerum, modice decenterq;
crassum, ac succulentum. Cuius dignitas
ac forma virum ostentabat; & ita indo-
lem referebat animi, vt animus nobilita-
tem generis ac maiorum gloriam. Nul-
lam hic Thalestris Amazonum regina,
sicut in Alexandro olim, cum rerum ge-
starum fama magnum quidem, sed cor-
pore paruum illum oculis metiretur,
causam inuenire potuisset, cur ob for-
mam minus luculentam de virtute dubi-
taret. Quin autem Dei fuerit munus illud,
nemo poterit ambigere, qui nihil pulchri
fortuito ac temere nasci, secum reputaue-
rit. Nempe verum est, quod non nemo
dixit; augustissimam quamque speciem
plurimum credi cælo trahere. Et ratio est
apud Deum, cur, quos magnæ sorti desti-
nauit, etiam venerabili corporis specie
donare amet. Igitur si quis faciem Nostri
aspexisset, nesciebat, ad venerationem
magis an ad amorem traheretur, ita quasi
G 3 fere-

sereni ac nitentis illa cæli imaginem præ-
bebat; sed in qua simul grauitas sedem
posuisse poterat videri. Nec alia voci,
quam ori inerat commendatio. Oculo-
rum quoq; vigor, mentem viuendam; tar-
ditas incessus hominem ostendit serium
& constantem. Galba olim fuerat gibbo-
so corpore deformis. Eius propterea in-
genium male habitare, ioco lepidissimo
Marcus Lollius dicere solebat. Nos con-
tra DRAXDORFFII nostri animum opti-
me habitasse, vere affirmare possumus.
nisi quod corpus satis in iuuentute va-
lidum, ætate ad senectutem vergente,
sensim deficere, ac pristini vigoris obliui-
sci; quin & redeuntibus morborum do-
lorumq; vicibus plurimum vexari cæpit:
Deo quasi de industria sic fatum viri ad-
gubernante, ne materia fortitudinis
etiam demonstrandæ destitueretur. Quam
in pace æque ac in bello, magno animo
exerceri posse, non eloquentia magis sua,
quam & sapientia censendus Cicero
veris-

verissime adfirmat. Ergo in castris alii,
inter tubas ac horrenda tormentorum
tonitrua, viros se præstiterint, profligaue-
rint hostes, laureas ac trophæa reportaue-
rint: attamen non minorem laudem.
Noster in vrbe, in ædibus, in lecto deniq;
suo credendus est sibi peperisse; magnifi-
ca ratione contemnendo pecunias, vo-
luptates, vanam gloriam, resque alias, in
quas hominum cupiditates cum impetu
feruntur; aduersosque, quibus virtutem
eius Deus exercere voluit, casus ac dolores
acerbissimos inuicta plane constantia per-
ferendo: eandem quemadmodum in
toga, ita & in sago demonstraturus am-
plius; si vel ad Martis ludendos ludos
ipsum fortuna vocasset, vel debile tan-
dem corpus animo, qui longe corporis &
modum & robur excedebat, potuisset
obsequi. Cuius virtutis vis cum in mortis
potissimum contemptu cōspiciatur; quis
hic vnquam, quam DRAXDORFFIUS,
fortior vel fuit antea, vel posthac est
futu-

futurus? Incredibile dictu est, quanta fiducia, quanta patientia, quanta animi tranquillitate & quiete corporis hostem istum, a quo neminem communis lex mortalitatis absoluit, expectauerit procul adhuc minantem, sustinuerit propius imminentem, ac ultimo tandem impetu vincentem ipse vincens eluserit, pudore confuderit, ex alto despexerit. Ad quem conflictum probe se antea prouidi militis instar, cum suis solius viribus diffideret, precibus, quas ardentissimas in cælum effundebat, firmissime munierat. Itaque post ultimæ voluntatis partim scripto, partim voce comprehensam ordinationem, cum totum se rebus curisque humanis subtractum Deo tradidisset: nihil deinde nisi peccata sua, quæ detestabatur; nisi Seruatorem suum, quem amplectebatur fide, cuius verbo, cuius sanguine ac carne subinde se refecerat; nisi cælum ac æternitatem, cuius candidatus ac flagrantissimus erat sititor, amplius locutus est:

vt

vt qui bona conscientia iam tū cœlestium
æternorumque, quæ mox plene perce-
pturus erat, gaudiorum dulcedinem præ-
gustaret. Sic non mortem tantum, sed
cum morte mundum vniuersum conte-
mnendo æternus victor iam triumphat.
Triumphet sane, triumphet Anima incola
iam cæli, amica Dei, Angelorum socia:
triumphet, inquam, ac tota gaudiis ebria,
miseriarū omnium, omnium in mundo
rerum sit oblita. At nunquam nos Tui,
ciues tui, ô Pater quondam patriæ, quan-
diu superesse nobis dabitur, obliuiscer-
mur: quos orbos, consilii opisque tuæ
egenos, plenos mœstitiæ reliquisti. Nun-
quā memoria nostra excidet annus huius
seculi sexagesimus secundus; nunquam
huius anni dies tum vndecimus Septem-
bris, tum eiusdem mensis decimus &
quartus: quorum illo amisimus, hoc ex-
tulimus, Senatus nostri principem ac de-
cus, magnam vitæ, spei salutisque nostræ
partem, fulcrum reip. ac columen: quibus
H die-

diebus, Te, ô iam beatissime DRAX-
DORFFI, amisimus, Te extulimus: post-
quam vixisses annos sexaginta octo, &
menses quinq; Heu quam acerbum, &
quod eloqui vix sustinemus, verbum no-
bis est, dicere, Te fuisse: ô quam malle-
mus dicere, Te esse! Namque Tu solebas nos,
ceu pater liberos amare; ceu oues pastor,
defendere ac tueri: tu curabas, vt nos
securi; tu laborabas, vt nos essemus otio-
si; tu, vt nobis bene esset, agebas omnia.
Qualia beneficia quamuis diffluerint ad
omnes, ad nos tamen peculiariter perti-
nuere, qui almam hanc studiorû Matrem
quacunq; necessitudine contingimus: &
cum olim beneficia, peculiariter nunc
etiam desiderium ac luctum ad nos perti-
nere intelligimus. Nam & nos patronum
ac tutorem, heu! quondam nostrum ami-
simus; qui vt discipulis industria, in-
dustria sua præmia; vt sua docentibus
auctoritas, atque ab auctoritate alacritas;
vt vis sua legibus, à legibus disciplinæ
vin-

vinculum; in vniuersum vt huic erudi-
tionis ac bonarum mentium officinæ
sua, quam semper hætenus possedit, di-
gnitas, laus & gloria constaret, longo
tempore nulli curæ ac studio, nulli operæ
ac labori pepercit; idq; cauit vnice, ne res
Scholastica detrimentum caperet. Volu-
ptas est recordari, quo fauore litterarum
honores merentibus conferri & iusserit
& viderit: vt ipsis honoribus honorem
ampliolem sua præsentia, sua approbatio-
ne addiderit. Aspectus eius non illos
modo exhilarauit, quorum solennitates
agebantur; sed nescio qua tacita vi reli-
quos etiam omnes ad virtutis laudisque
studium inuitauit. Imo voluptas est re-
cordari, quam faciles ac beneuolas iustis
doctorum publicorum aliorumque se
adeuntinm desideriis præbuerit aures;
quam neminem eorum vnquam si-
ne solatio, ac certa spe auxilii, ne-
minem vnquam tristem a se dimiserit.

H 2

Flo-

Floruit sub Præsidente tali Academia, floruerunt litteræ, fundamentum præsentis, ac futuræ felicitatis indubitatum pignus. Quam fortunam cum debuerimus DRAXDORFFIO, partem sibi huius meriti vindicant Viri maximi, quos ille in regiminis Scholastici munere habuit Collegas, INGOLDUS, MEIERUS, WENCKERUS, STEMLERUS: quibus nominibus, qui & quales tituli, honores, virtutes ac decora contineantur, nemo adeo in rebus Argentoratensibus est hospes, qui ignoret. Scilicet æquum est, vt, qui earundem pro Academia iuuanda ornandaque curarum ac laborum gessere partem, partem etiam inde partæ laudis gloriæque capiant Nec profecto hic verendum est, ne id forte contra mentem sit defuncti. Nam & ipse, cum adhuc inter uiuos degeret, idem fateri nequaquam dubitauit. quippe qui suæ etiam in aliis virtuti fauere cōsueuisset; nec maligne crederet suæ gloriæ decedere, quicquid tribueretur alie-

alienæ. Et si adhuc vocalem eum esse
mortis conditio pateretur, etiam e sepul-
chro dignum fidei auxiliique sibi præstiti
magnis Collegis illis suis testimonium
perhiberet. Sed quod quæ fuerunt ante,
adhuc sint, hoc est, quod adhuc Schola;
in Schola litteræ florent, vigeantq;, hoc
Vestrum beneficium est, Eminentissimi
Triumviri, quorum cervicibus rei Schol-
asticæ cura iam incumbit: imo benefi-
cium est Dei, qui Vos e cælo dedit, vt in
tantorum decessorum Vestrorum, non
virtutem minus & gloriam, quam locum
ac munus succederetis. In Te enim, Gene-
rosissime Cancellarie, HENRICE BAL-
THASAR a KIPPENHEIM, in Te super-
stes nobis vivit adhuc DRAXDORFFIUS
noster, qui cum bonorum suorum parte
omnes simul dotes Tibi laudesq;, quibus
olim eminuerat, transcripsit. Sed nec in
Vobis, Viri Nobilissimi, ANDREA
BRACKENHOFFERE, & IOHANNES
IACOBE KIPSI, Scholarchæ benignissi-

H 3

mi,

mi, nobis deest vel Ingoldi magnus in-
uictusque animus; vel ad demerendos
homines eximia humanitas Meieri; vel
profundo in pectore recondita pruden-
tia Wenckeri; vel Stemleri circumspecta,
& magna cum deliberatione ad negotia
accedens prouidentia; vel cæterorum,
qui ante hos fuerunt, omnium curæ ac
solicitudines, quibus Scholam vel ab ini-
tio condere, vel conditam altius euehere,
vel euectam conseruare, atq; ad posteros
transmittere aduigilarunt. Pergite ita,
DOMINI, quorum curæ fideique Deus
Academiam commisit, quod hætenus
fecistis, porro facere: hoc est, pergite &
eorum, a quibus Scholam per manus qua-
si accepistis traditam, splendido exemplo,
& stimulo propriæ virtutis excitati, tum
communem ciuitatis Vestræ, tum propri-
am gloriam, bonarum litterarū officinas
ac doctores tuendo, consummare; atq;
æternitati, quam meremini, etiam hoc
pacto nomina Vestra consecrare. Sed &
Vos,

Vos, qui præter illustres Academiae Cura-
tores, ex Reip. vel Proceribus, vel Consi-
liariis adestis, Viri Generosissimi, Nobilif-
simi, & Amplissimi, Patres Patriæ ac Patro-
ni Scholæ benignissimi: & Vos, inquam,
pergite consilium operamque Vestram
iungere ad promouendum opus tam Deo
placens & sanctum, tam vrbi Vobisq; ho-
noricum, tam liberis posterisq; Vestris
vtile ac optabile. Quos sane nulla re for-
tius ad æternas Vobis agendum grates
potestis obligare, quam si & hanc sublimis
Vestri muneris, quod in rep. administran-
da consistit, haud sane partem infimam,
curæ vobis cordiq; esse patiamini. Non
ipsi solum Academiam habete Vobis
commendatam; sed eandem etiam Am-
plissimo Ordini, cuius præfulgentia estis
vel membra vel ministri, Vestris verbis
de meliore nota commendate. Credite
DRAXDORFFIUM moriturum deside-
riis vltimis hoc ipsum a Vobis petiisse:
inprimis, a Te, Generosissime Prætor,
PHI-

PHILIPPE ALBERTE BERNOLDE: qui
quanti non tam ob sanguinis, quo iunctus
illi fueras, quam virtutis cognitionem,
eidem fueris æstimatus, id vltimo, quod
reliquit, iudicio omnibus cognoscendū
dedit. Omnes Vos, ô Animæ venerandæ,
& quæ victuris litterarum præconiis a
morte vindicemini, dignissimæ, Scholam
quæso commendate. Dicite, quod ea sit
cæli munus, decus vrbis, salutis officina
publicæ: quæ idoneos rectores ciuitati-
bus, cathedris doctores, patres familiis;
in vniuersum Viros pios, honestos, erudi-
tos, ad varia munia præparet humano ge-
neri ac subministret. Dicite hæc, atque
exemplum Vestrum in fidem dictorum
allegate. Approbabit, scio, approbabit
cōmuni consensu inclytus Senatus istum
sermonem Vestrū; & ipse sibi Vobiscum
gratulabitur, de pignore tam caro, tam
pretioso: atq; in custodiam huius ac pro-
pagationem quicquid curarum, laborum,
atque etiam sumptuum vel hætenus im-
pensum

pensum est, vel porro impendetur, optime atque vtilissime & collocatum esse, & collocatum iri, decreto non in annum, sed in perpetuum valituro confirmabit. Deus Vos, cum vniuerso Amplissimo Senatu, ô inclyti Reip. ac Scholæ Proceres, conseruet. Liceat nobis, quod votum in ædibus quisque nostris quotidie pro incolumitate Vestra, pie solemus nuncupare, idem nunc etiam in publico hoc loco, & Vobis & cæteris omnibus audientibus repetere. Cur enim vsquam aut vnquam id faciendi nobis tædium subiret? qui non ita barbari ac rerum ignari sumus, vt non intelligamus, a salute Vestra nostram esse suspensam, adeoque, si pro Vobis precamur Deum, nos precari pro nobis ipsis. Ingemino igitur: Deus Vos conseruet; seroque, & non nisi, postquam & plurimos ætati Vestræ iam transactæ annos, & plurima laudibus iam par-tis decora noua adieceritis, vitæ gloriæq; saturos ex orbe hoc in cælum iubeat

I

redi-

redire. vbi DRAXDORFFIUS quondam,
& Vester & noster suarum iam virtutum,
suorum laborum, meritorum suorum,
inter sidera ac stellas, imo sideribus ac
stellis multo sublimior, multo clarior, in
sinu Abrahæ, in Christi brachiis, in con-
spectu Dei, æterna & nunquam finitura
capit præmia: vbi lætitiarum immenso
quasi oceano superfusus, præ illa beatitu-
dine, in qua iam constitutus viuit, omnem
& natalium, & opum, & honorū & rerum
aliarū, qualibus terra potuit virtutem eius
remunerari, fluxum, caducum, ac tempo-
rarium splendorem, alto despicit super-
cilio, superboque pede conculcat: vbi
vnicum ac summum bonum oculis infa-
tiabilibus intuetur, vlnis fatigari nesciis
amplectitur, hymnis in æternum dura-
turis, etsi non extollit, tamen si posset,
extollere gestit. Quid igitur? Nos, ô
beatissime DRAXDORFFI, licet non am-
plius Te aspicere, nō amplius Te amplecti
pos-

possimus : attamen, quod solum nobis
est reliquum, nomen ac memoriam Tui,
quandiu hoc in orbe erimus superstites,
omni honore ac veneratione, omnibus
bonis verbis ac recordationibus prose-
quemur : atque inter nos, quotiescunq;
conuenerimus, Te memorabimus fuisse
Patriæ ac Scholæ nostræ Patrem, pium,
prudentem, industrium, benignum, feli-
cem : memorabimus Te fuisse virum
maximum, virum optimum ; generis
humani, inprimis vero ciuium tuo-
rum amorem ac delictum.

DIXI.

In

Errata, quæ pauca remansere e. g. disciplina pro
disciplina, sollicitus pro sollicitus, axilio pro auxilio, item
in aliquot vocabulis, vt in pæna, cælum, & mæror, æ pro
œ positum, & si quid præterea est, beneuolus Lector ipse
inter legendum apud animum suum corrigit.

IN
PANEGYRICUM,
quo Memoriam
VIRI GENEROSISSIMI
IOHANNIS CHRISTOPHORI
DRAXDORFII,

Reipublicæ Argentoratensis
Prætoris, Senatus Principis, ciuium Pa-
tris, Academia Cancellarii, vndi-
quaque præclarissime
meriti,

publico nomine veneratus est

V. CL. SAMUEL SCHALLESIIUS,
Eloquentiæ Professor Excellentissimus.

Alfaticos inter Proceres, & clara
Senatus
Lumina, quæ priscæ præfulgent
gentis honore
Et meritis, quantum DRAXDORFFIUS
instar haberet;
Cōditor haud impar tantis *Schallesius* actis
Miran-

Miranti exposuit facundâ voce Coronæ.
Felices operû! scribenda patrauerat ILLE,
Iste legenda stilo signauit. *scriptor &*
AUCTOR (ambo.

Supparibus viuent per sæcula laudibus
ILLE Pater Patriæ, Fabius, Curiusq; Cato-
Iustus Aristides, ciuili more animoq; (que,
Timoleon; virtutis consiliiq; vigore
Inferior nullo, quos Roma aut Græcia
laudat: (verbis

Tullius *Hic*, quotiens diffundi splendida
Materies, vel si memorari strictius optat,
Plinius, & pennæ dominus sublime vo-
lantis.

Det Deus, vt quoniam bene gestis rebus
abundans (nebit,
Argentina fuit semper, semperque ma-
Non desint vnquam, bona qui bene dice-
re facta

Possint, exemplis serosq; iuuare nepotes.

*Affini honoratissimo typis vulganti Panegyricum
adiexit αὐτοχέστος*

Io. HENRICUS BŒCLERUS.

Con-


Contulit in Patriam qui plurima commoda, remq;
Communem priuæ, dum fuit, antetulit:
Et qui quam studiis partem Lex summa dicanit
Vrbis Palladium credidit esse suæ,
Defensamq; magis DRAXDORFFIVS extulit, æquas
His meritis laudes post sua fata capit.
Laudes ore suo SCHALLESIVS explicat, omnis
Doctorum assensu sed pia turba probat.
Scilicet eloquio ferri non impare Virtus
Debuit, exemplis connumeranda bonis;
Quò bonus Orator mansuro in secula scripto
Illustris meriti perpetuaret opus.

Obferu. cauff. Imq;
adiecit

M. Ioh. Christophorus Artopœus.

F I N I S.

opus.



R E C T O R
V N I V E R S I T A T I S A R G E N T O R A T E N S I S
J O H A N N E S A L B E R T U S S E B I T I U S ,
M E D I C I N Æ D O C T O R E T P R O F E S S O R
O R D I N A R I V S ,

Lectori Beneuolò S. P. D.

P Ræclara, omnique laude & commendatione digna extat apud *Hippocratem*, dogmaticæ & rationalis Medicinæ Principem, in epistola ad Senatum populumque Abderitarum exarata sententia. Beata, inquit, illæ censendæ sunt gentes, quæ cognitum perspectumq; habent, Viros bonos & probos, sua esse *ἐρύματα*, munimenta, non turres, non alta mœnia, non etiam, addo ego, valida & fortia valla, fossasue profundas. Et rationem statim subiungit, quoniam bonorum virorum, & honestatis omnisque virtutis amantium, bona quoque, prudentia, & salutaria esse consilia consueuerunt. Experimur enim, munimenta ista fluxa esse atque caduca, ac posse tormentis machinisque bellicis euerri, diffici, sologue æquari: bonorum autem prudentiumque Virorum consilia esse durabilia, ac Rerumpublicarum statum felicem non modò conseruare, verùm etiam amplificare, & ad seram vsq; posteritatem laudabiliter propagare: ita vt non immeritò veterum quidam dixerit, quòd Respublicæ tamdiu florere ac vigere soleant, quamdiu in illis sapientia & consilia regnant ac florent. Proinde Viris sapientiæ nomine celebratis per mortem ereptis, actum de illarum prosperitate videtur: idque eò magis, quoniam Viros inuenire, qui consilio & prudentia polleant, admodum est difficile. Sic enim *Artaxerxes*, Persarum Rex potentissimus, ad *Hystaniden*, Hellepontii Præfectum, olim scripserat, cum in mandatis illi dedisset, vt *Hippocratem* ad se ablegaret, quò grassante tunc temporis peste, vsui sibi emolumentoque esse posset. Anxios enim, perturbatos, valdeque sollicitos suos esse milites, non belligerantes debellari: sauciari multos, ægreque illos pestem fecisse curabiles: venenata ipsis incussisse spicula: ac propterea consilii se esse inopem: neque ampliùs habere, quod cum Viris naturâ prudentibus deliberare queat. Talem Virum, bonum scil. veræ pietatis studiosum, & salutarium consiliorum plenissimum, habuimus nostra in Republica & Vniuersitate Generosum, Nobilissimum, maximeque Stre-

Strenuum, atq; Amplissimum Dominū IOHANNEM CHRISTO-
 PHORUM à Draydorff/Prætorem & Tredecimviriū Reipublicæ
 meritissimū, & Vniuersitatis Cancellarium ac Scholarcham lauda-
 tissimum, qui post multos exantlatos labores, deuoratas molestias,
 latas curas, variasq; corporis ægritudines tandē superatas, præterita
 die Iouis, quæ erat Mensis Septembris XI. paulò ante septimam ma-
 tutinā, piè & deuotè in CHRISTO Salvatore suo, inter preces arden-
 tes, & lacrymas adstantium vbertim profusas, obdormiuit: ita vt
 inclytus ordo Senatorius obitum tanti Viri non immeritò lugeat:
 multis illum prosequatur fletibus Academia: ingemiscat Ecclesia:
 boni cordatiq; Ciues omnes in mœrore & tristitia haud leui versen-
 tur. Quapropter meritum illius est, vt cuiusq; status & ordinis Viri
 vltimum illi honorem exhibeant, & sua nobili, spectabili, & insigni
 præsentia exequias eius cohonestent. Honor quippe ab hominibus
 debetur, quos Deus ipse maximo dignos honore iudicauit. Iudicauit
 autem dignos Magistratus, eosq; Pl. 92. Deos & Filios Altissimi no-
 minauit: quo sanè elogio nullum maius excogitari, neque verbis
 exprimi potest. Solito autem more μακαρίτην nostri, nunquam sine
 honoris præfatione nobis nominandi, vitæ curriculum delineabo.
 Natus est anno 1594. 1. Aprilis, in arce Wantzenauensi, Patre, Viro
 Nobilissimo, Dom. IOANNE CHRISTOPHORO à Draydorff/
 Præfecto primū Episcopali in Wangenau: postea verò Præfecto
 superiore in Oberfirsch/ quod oppidum est Serenissimi & Celsissimi
 Ducis Württembergici, &c. Matre verò VRSULA, ex Nobilissima
 Iohmiorum à Mundolsheim profapia oriunda, Matrona omni vir-
 tutum genere ornatissima. Cum verò pientissimi Parentes ex sacris
 didicissent probè, Pietatem ad omnia vtilem esse, & promissiones
 habere huius & æternæ vitæ, prima ipsorum cura erat, vt Filius sibi
 natus sacro Baptismatis fonte ablueretur, & in numerū Filiorū Dei
 reciperetur: postea verò, cum ad maturiorem ætatem peruenisset,
 non solum in orthodoxæ religionis capitibus diligenter informare-
 tur, sed etiam ad literarum humaniorumq; artium studia, quæ No-
 bilitatis pulcherrima sunt ornamenta, assiduè adhiberetur. Literarū
 studiis mediocriter imbutus, vt multorum hominum mores & vrbes
 videret, fieretque, sicut Homerus loquitur, πολύτροπος, ablegatus est
 ab honoris causa iam nominatis Parentibus in Galliam, Angliam &
 Italiam. Redux in Patriam factus, de matrimonio cogitauit, viceque
 prima connubio sibi stabiliq; nexu ligauit Virginem, non generis
 modò,

modò nobilitate condecoratam, sed etiam animi corporisq; bonis
 egregiè insignitam, EUAM SUSANNAM, Nobilissimi, Strenui,
 & Amplissimi Viri, Dom. IOHANNIS HENRICI VOLZII ab
 Altenau / Prætoris quondam nostræ Reipublicæ meritissimi, &
 Nobilissimæ itidè laudatissimæq; Dom. VERONICÆ ab Endingen
 Filiam dilectissimam. Verùm sterile hoc primū fuit matrimonium,
 ipsaq; suauissima coniunx 16. Aprilis Anno 1629. diem suum obiit.
 Cū verò bonum non sit, hominem esse solum, secundum matri-
 monium iniit cum Nobilissima Virgine AMELIA Zornin / Viri
 maximè Strenui & Nobilissimi Dn. IACOBI Zornen à Plobsheim /
 & eiusdem nobilissimæ coniugis, AMELIÆ Zornin / ex Nobilissi-
 morum Wormbserorum à Schaffolsheim familia natæ, Filia: cum
 qua duos quidem genuit Filiolos, sed defunctos in lucem editos,
 Filiolamque vnicam, EVAM AMELIAM baptizatam, quæ tamen
 post semestre elapsū ex sordida huius mundi colluie discessit.
 Ipsa quoque Mater, desideratissimi nostri Prætoris & Cancellarii
 medullitūs dilecta coniunx, d. 2. Ianuar. Anno 1656. ærumnosum
 vitæ huius ergastulum reliquit. Postquam autem Deo OPT. MAX.
 in cuius manu sortes sunt nostræ, placuisset etiam secundam vxorem
 ad se ex mundi huius miseriis euocare, tertium contraxit matrimo-
 nium cum Nobilissima Dom. MAGDALENA ab Hünoldstein /
 Nobilissimi, maximèq; Strenui Viri, Dom. GEORGII WILHELMI
 ab Hünoldstein piæ memoriæ vidua, & Nobilissimi, Generosissi-
 miq; Viri, Dom. GEORGII à Geispsolsheim in Lautern / & Dom.
 MARGARETGÆ, natæ ex prænobili Blieckiorum à Siechrenberg /
 Filia. Integritate vitæ, morum probitate, & ingenii illius perspectâ
 felicitate, Anno 1621. & 1622. assignatus est Adfessoribus minoris
 Senatus. Postea euectus ad gradum altiore, nempe ad Senatum
 maiorem: cui muneri inferuit Anno 1623. & 1624. Anno 1625.
 rediit vice secunda ad Senatum minorem, ei, operam suam nauauit
 vsque ad d. 12. Septembris eiusdem Anni. Tū enim in ordinem
 Viginti vnumuirorum fuit ascitus. Annis sequentibus, nimirum
 Anno 1626. 627. 629. 630. 632. 633. 635. 636. 638. 639. 641.
 642. 644. 645. 647. 648. 650. 651. 653. 654. 656. 657. 659. 660.
 Adfessor fuit Senatus maioris. Anno 1626. d. 22. Iulii ordinatus
 Præfector illorum Ciuitatis locorum, qui vulgò Almend vocantur,
 & annum censum Magistratui tribuunt. Anno 1629. d. 28. Martii
 receptus in Collegium Dom. Quindecimuirorum, & incendiorum
 Præ-

Praefectus constitutus. Anno 1633. d. 19. Octobr. Praefectus Claustri
 siue coenobii Poenitentialium electus: eodemque etiam rei Vinariae
 & dynastiae Herrensteinianae supremus inspector salutatus. Anno
 1635. Primas aedilis dictus, eodemque d. 8. Ianuarii in numerum
 Dom. Praetorum accersitus, simul etiam d. 15. Iunii Cancellarius
 Vniuersitatis factus. Anno 1637. d. 29. April. Praefectus rei frumen-
 tariae, siue publici granarii creatus. Anno 1637. d. 22. Nouembr.
 diuersorii pauperum Aduenarum declaratus, eodemq; etiam d. 29.
 Nouembris Praefecturam S. Nicolai in vndis nactus est. Anno 1638.
 d. 20. Augusti, feudū & Praefecturam Wangenheimensem ab Illustri
 & Generosa Dom. Abbatissa S. Stephani impetrauit. Anno 1640.
 d. 16. Iunii collegio Dom. Tredecimuiorum associatus: eodemque
 d. 28. Iunii Praefecturam territorii Walslenheimensis consecutus.
 Anno 1655. d. 29. Martii inspectio suprema Cancellariae, siue Gram-
 matophylacii ipsi fuit demandata. Anno 1656. d. 27. Maii praefectu-
 ram Carthusiae in se suscepit. Quibus officiis ac mueribus quanta
 diligentia, cura, fidelitate & dexteritate Nobilissimus Dom. Praetor
 fuerit defunctus, notius est, quam vt pluribus à me recenseri debeat.
 Aeternam sanè nominis sui famam post se reliquit, non ob merita
 solum in Rempubl. nostram collata, sed ob frequentes etiam Aca-
 demicas promotiones Doctorum, Licentiorum, Magistrorum,
 Poëtarum, & Baccalaureorum, quibus & interfuit, quantum illi per
 valetudinem licuit, & vice Sacrae Caesaræ Maiestatis nostrique Ma-
 gistratus inclyti potestatem promouendi Brabentis ultra 27. annos
 liberalissimè concessit; concessurus etiam fuisset vltèrius, si ita
 diuino placuisset Numini. Verùm maluit illum senio confectum,
 curis atque laboribus fractum, & multis ægritudinum agminibus
 afflictum ex lacrymosa mundi valle ad se euocare, & vita illa ignara
 mortis, nescia tristitiæ, doloris ac laboris experte, totiusq; elegantiae
 & dignitatis, vt D. *Augustinus* loquitur, plenissima, donare. Cuium,
 & subditorum huius vr̃bis nunc est, Deum præpotentem precibus
 inuocare ardentibus, vt in Dom. Praetoris & Cancellarii locū digne-
 tur surrogare alium, qui pari authoritate, fide, & dexteritate negotia
 Reipubl. & Vniuersitatis sibi commissa expediat. Funus efferetur
 hodie hora prima ex aedibus Dom. Praetoris defuncti, ea in platea
 sitis, quæ nomen à summo templo sibi vicino accepit. Perscriptum
 Argentorati, d. XIV. Mensis Sept. Anno recuperatæ per CHRISTUM
 Mediatorem salutis humanæ M DC LXII.

RECTOR

R E C T O R
V N I V E R S I T A T I S A R G E N T O R A T E N S I S ,
I O H A N N E S M E L C H I O R S A C H S ,
V . I . D . E T I N S T I T U T I O N U M I M P E R I A L I U M
P R O F E S S O R O R D I N A R I V S .

L. S. P.

Vetustissimam iuxta & laudatissimam fuisse consuetudinem inter gentes non prorsus inhumanas & barbaras, (eas enim nihil moramur, quæ nihil sua interesse post mortem arbitrabantur, huminè an in sublimi putrescerent, & vtrum feris & volucribus laniandi proiicerentur, an honestè conderentur suæ reliquæ, sicuti neq; illas quæ senio confectos macerabant & deuorabant, vt de Tribalis memoriæ proditum est) tum solenni apparatu & pompa honestandi defunctorum exequias, tum certo temporis intervallo iusta illis persoluendi ac parentandi, ex Historicorum lætione manifestum est. Sanè quod ius funerandi attinet, Romanis maximè curæ fuit honesta & decens sepultura, & ad publicam vtilitatem pertinere existimarunt, ne infelulta iacerent corpora siue cadauera: ad. eripserunt etiam humanitati, misericordiæ & pietati, si quis cadauer, maximè quod alienum seu extraneum foret, funerasset, vt patet ex *l. si quis sepulchrum. 12. §. hoc editum. 3. l. Et si quis. 14. §. sed interdum. 7. l. sunt personæ. 43. de relig. Et sumt. fun.* indeq; actionem funerariam ex æquo & bono introduxerunt, quam dabant ei, qui propter funus aliquid impendisset, ad id recuperandum, *dd. Et si quis. 14. §. hac actio. 6. ff. d. t.* Non exponam nunc Decemuirorum Leges, inter quas non postremum sibi vendicat locum illa, cuius vestigia extant apud Cicero- nem *lib. 2. de Legib. & Plinium lib. 21. c. 3.* QVEI CORONAM PARIT IPSIVS PECVNIAEVE EIVS VIRTVTIS ERGO DEDITOR; IPSEIQVE MORTVO PARENTALIBVS EIVS QVOM ENTVS POSITOS EST, QVOMQVE FORIS EXFERTOR IMPOSITA SE FRAVDE ESTOD: cuius explicationem videre licet apud Rittershusium ad LL. XII. Tabb. *cl. 1. c. 10. p. 31.* Vnicum Polybii locum *lib. 6.* adducam, quem hîc integrum adscribere haud piget: *Si quando, inquit, apud Romanos quispiam ex illustribus Viris ex hac Vita discesserit, elato funere portatur cum reliqua pompa ad rostra sic dicta in forum, Et nunc stans conspicuus, nunc obuiolatus, idque raro, vniuersa plebe circumstante rostra ascendit, siquidem filius adultus super- sit ac praesens existat: sin vero alius quinquam ex ipsius genere, ac demor- tui Virtutes, Et qua in Vita praclarè gesserit, depradicat. Et hinc accedit, Et multi admoneantur, Et qua gesta sunt inspiciant, stantque non illi modò, qui operum illius fuere consortes, sed Et exteri & sive adeò compatiētes, Et casus eiusmodi non solum illis, qui periclitantur proprius, sed Et populo videatur esse communis. Et paulò post, cum de imaginibus dixisset, quas in vesti-*


vestibulo ædium ponere & colere consueuissent Romani, hæc subiungit:
 Sibi autem præclarus aliquis ex domesticis vltimum diem obiit, instituit
 funeris elationem, & circumfusi, qui simillimi magnitudine ac reliquâ sta-
 turâ videntur, vestitum & surpant, si vel Consul, vel Imperator fuerit pur-
 pura circumdatum, si Censor purpureum, si triumphum egit, vel tale quid
 perfecit, auro contextum; isti curru sic incedunt: fasces & secures ac
 reliqua Principatibus consueta, secundum dignitatem cuiusque præcedunt,
 quo dum in viuis esset, in Rep. eminuit. Vbi ad rostra veniunt, cuncti ex ordi-
 ne sellis elephantinis sedent, quo spectaculo haud facile poterit quicquam
 spectari pulcrius inueni gloria & honestatis cupido. Etenim eorum Viro-
 rum, qui virtutis gratia glorificantur, videre imagines, easque omnes veluti
 viuas, quem non excitaret? quodnam aliud pulcrius spectaculum? Præ-
 terea, qui de iam sepeliendo mortuo concionatur, etiam de aliis discurrere in-
 cipit, id primum de maiore natu ex his, qui præsentibus sunt, recensens, quid
 quisque illorum consecutus sit ac gesserit; unde sit, & frequenter bonorum
 Virorum præconia virtute acquisita renouantur, ac celebras illorum, qui
 honesti aliquid gesserunt, immortalis ad posteros propagetur, & gloria
 illorum, qui patria benefecerunt multis innotescat. Et quod maximum est,
 iuuentus ad hoc pronocatur, & nihil non pro Reip. commoditate ferendum
 subeat, quo celebrassem, qua bonos viros comitatur, consequatur. Hæc-
 tenus Polybius. Sic primus apud Romanos funebri oratione collegam suum
 Iunium Brutum laudauit P. Valerius Publicola Consul anno primo post Re-
 ges exactos, quam orationem tam acceptam, tamque charam populo fuisse
 Plutarchus scribit, ut inde tractum sit, ut omnes boni & magni Viri, cum
 fato concessissent, ab optimis laudarentur. Qui honor posterioribus tem-
 poribus etiam illustribus iuuenibus & claris mulieribus, quemadmodum
 cum ex aliis, tum ex Plutarcho, Suetonio, Dione manifestum est, fuit con-
 cessus: hisque sic peractis funus procedebat, donec ad locum veniretur, ubi
 mortuus vel sepeliendus vel cremandus erat. Cæterum cum nonnulli essent,
 qui suorum vel propinquorum, vel amicorum desiderium minùs ferre pos-
 sent, tertium, septimum, nonum, & quidam vicesimum, trigessimum, quadra-
 gesimum manibus & memoriæ statuebant, unde parentationes, feralia, no-
 uendalia, decenalia, vicensalia, tricenalia, &c. originem traxerunt, harumque
 parentationum non postrema pars fuit defuncti, mediocri adhibita commise-
 ratione, laudatio; quâ pariter defuncti iam humati virtutes & dicta & facta
 egregia, adeoque totius vitæ cursus recenscebatur & felicitas decantabatur.
 Et si enim nullum ex iis rebus emolumentum ad defunctum peruenire
 nouerant: tamen æquum, iustumque iudicabant, animum erga præclare
 de se meritos memorem gratumque modis omnibus declarari, eorumque
 virtutes non solum præsentibus, verum etiam ex oculis ablatas coli: & in
 conspectu monumenti censebant inesse plurimum, ut tum pudore inhonesti
 funeris malorum improbitas coerceretur, tum honoris vltimi desiderio ad
 virtutis studium bonorum incenderetur alacritas. Nominatim verò hæc in
 parte laudatur Atheniensium institutum, qui non solum indignos honori-
 bus existimabant eos, qui debito obsequio & obseruantia parentes non cole-
 bant suos, utpote quos neque sacrificia pie facere, neque aliud quicquam ho-


honestè, iusteque agere posse crederent: sed in Magistratum quoque electionibus, si quis Parentum sepulchra non ornaret, diligenter inuestigabant. Ex hoc fonte manasse in Ecclesiâ videtur dierum-festorum celebratio, sancita initio partim ad considerandam hominum Sanctorum, quibus alter quasi natalis fuerat beata ex hac vita ærumnosa ad cœlestem emigratio, memoriam, partim ad prædicandam æternam DEI bonitatem, qui per defunctorum ministerium singularia in genus humanum contulisset beneficia, partim denique ad prouocandos ad eorum imitationem superstites. Sed quod in plerisque aliis rebus bonis ac laudabilibus solet euenire, idem etiam in hoc bonorum genere videmus factum. Nam vt Gentilium taceamus ambitionem, qui arduo & operoso monumentorum honore, aut magnifico ludorum, conuiuiorumque apparatu non tam defunctos honorârunt, quam viuentes ita onerârunt, vt profusione nimia ad inopiam multi redacti fuerint: quis superstitionem ignorat ab his initiis in Ecclesiam introductam & in annos prope singulos cumulata, quâ res eo tandem rediit, vt immodicè aucto dierum festorum numero, otium illud non ad res sacras, DEOque gratas & hominibus salutes conuerteretur, sed iis rebus, quas maiores nostri etiam Ethnicis vitio verterant, consumeretur? Imò tantum absuit, vt ad DEI gloriam, hominum piè quondam mortuorum memoria & celebratio conferretur, vt ad summam quoque diuini nominis contumeliam dedita operâ dirigeretur. Non enim veriti sunt quidam scribere: honorandos sanctos, vt quam per nos salutem habere non possumus, eam illorum intercessionibus adiuti mereamur; per sanctorum gloriam, quæ in ipsorum festiuitatibus proponitur, nostram alendam, augendamque esse spem & securitatem. Si enim mortales homines nobis similes ita potuerunt per sua merita sublimari, non esse cur idem nobis euenturum desperemus: reddendum Sanctis debitum mutux vicissitudinis, vt qui de nobis festum agunt in cœlo, de iis festum nos agamus in terris &c. Sed his verbosius exponendis intempestium nunc fuerit diutius immorari. Nos gratias agimus æterno DEO immortales, qui superiori seculo ab his quoque dierum malefactorum sordibus Ecclesias nostras repurgauit, excitatis in hac potissimum Academia iis Viris, quorum nomina & merita grata prædicabit posteritas. Illorum verò in locum cum diuina nos suffecerit gratia, quemadmodum aliis in rebus, ita in hoc parentandi officio æquum, piumque sensimus, nos eorundem, qui recto nos itinere præcesserunt, sequi vestigia. Nam & illi habuerunt quorum hanc in parte imitarentur exempla, Aegyptiorum scilicet priorum deflentium Iacobum Patriarcham defunctum septuaginta diebus; Israelitarum deflentium Aaronem mortuum triginta diebus; eorundem Israelitarum deflentium Moysen itidem triginta diebus, utique non tam eiulatibus, quam orationibus funebribus, quæ exempla Syrachii filius in suis posterioribus doctrinis suo tempore æmulatus fuisse videtur. Quamobrem cum Viro Generoso perquam Strenuo DN. IOHANNI CHRISTOPHORO à DRAXDORFF, Prætori ac Tredecim Viro inclutæ huius Reip. gratissimo & Vniuersitatis vltra annos 27. CANCELLARIO Eminentissimo, heu quondam! nostro ante annum & quod excurrit, supremum pietatis & humanitatis officium summo luctu præstiterimus, exuiuis illius Christiano ritu terræ

omni-

omnium matri commendatis, Parentationis hunc honorem, DEO propitiantie, addemus. Amisisse siquidem tantum CANCELLARIUM, fide, prudentiâ, gravitate celebrem, consilii fidelem & cautum, eximio, longoque rerum usu insignem, tam puræ conscientiæ, quam exactissimæ iustitiæ tenacem, vulnus est non summam cutim perstringens, sed pectus intimum afficiens, & sui recordationem in omnium animis subinde excitans. Ad hanc ergo confirmandam altiusque animis nostris infigendam & æternitati consecrandam cum Vir Excellentissimus & Clarissimus Dn. SAMVEL SCHALLESIVS, Eloquentiæ Professor Ordinarius, Fautor, Collega & Affinis honorandus, tam Generosi VIRI vitam, parentationis in modum, publicè sit expositurus, & quæ ad laudem, omnibus ex causis gravissimo DN. CANCELLARIO debitam pertinebunt, luculentâ & doctâ oratione, quod spondeo, persecuturus sit: nostrarum partium erit, ob tot tantaque in Remp. merita, & innumera in Vniuersitatem beneficia, huic publicæ pietatis, solennisque recitationis actui frequentissimè interesse. Ad hoc igitur officium piis & sanctis, Summi Viri (cuius pietas in DEVM, fides in Rempublicam, charitas & candor in proximos, vitæ integritas, aliæque virtutes animique dotes nunquam intermorientur) manibus pio affectu præstandum, cum dies quartus Nouembr. dictus sit, vt Omnes omnium Ordinum, cuiuscunque dignitatis & conditionis sint, inprimis autem Academiæ Ciues ad suam erga piè Defunctum DN. CANCELLARIUM affectionem contestandam & obseruantiam declarandam, frequenter conuolent, eâ, quâ par est animi reuerentiâ, studioque rogo & contendo. P. P. Argentorati 2. Nouembr. A. O. R. clb Idc LXIII.

pi-
ru-
que
na-
num
Ad
nitati
MVEL
de AE-
odum,
affimo
atione,
itaque
re pic-
tatur
Rem-
nutes
nitam-
num.
Cines
con-
i, qua
torati





005643742

